



Senin, 14 September 2020
Ogen: Heber 13:5



Ermengkah Kerna Si Lit



Lit belas-belas nina *"sada pe bias dua pe kurang"*. Adi si ukuri terbagesen tuhu memang manusia la pernah erbias-bias nandangi kai pe. Adi nggo erdahin, lalap si akap kurang pemasuken, adi nggo tukur sada barang merincuh ka kita nukur barang sidebanna.

Penungkunenna man banta gundari eme : pernah nge kita ngataken bujur man Dibata kerna kai si nggo lit bas kita? Entah taren ngukuri kai si jadi sura-surata lupa kita ngataken bujur! Heber 13:5b nina : *"ermengkahlah atendu asa si lit i bas kam"*. Mberat? Perban si akap kita pe kekurangan denga? Adi siukuri secara doni payo tuhu mberat. Mbue denga sura-surata lenga tersehi, siakap lalap silit bas kita pe kurang denga. Enda me si jadi factor utama maka turah kebiaren e. I bas Heber 13:5c *"asa ndigan pe la kam kupulahi"*.

Enda me jadi dalanta guna ngasup ermengkahlah kerna si lit i bas kita. La ipediat Dibata kita si sada bas kekurangenta e. Dibata tetap ras kita rasa lalap. Ertina IA rembak lalap ras kita, emperdiateken kegeluhenta, encukupi keperluan geluh dengen nampati tupung kita la megegeh. Seh ku pusuh iperdiateken Tuhan, itambahina keriahen man si ernalem man baNa. Em dalanna kita ermengkahlah. Adi ermengkahlah kerna si lit labo erbanca kita kote, la man, lanai erkesah tapi bas kita ermengkahlah e Dibata tetap mereken gegeh man banta. Ula kita merangap nandangi duit, sebab labo duit singatur keg`eluhenta tapi Dibata me si ngaturkenca.

Duit jadi alat nehi keperluan geluh tapi adi la pentar banci kita ikuasaina. La pernah puas nandangi kai si enggo lit. Tapi adi nggit kita ermengkahlah kerna kai si lit, lanai kita mbiar ndalani kegeluhen. Tuhan enggo ngaturken kerinana, kita terjeng ndalanisa.